

## 龍樹菩薩讚禮阿彌陀佛十二文

至心歸命禮西方阿彌陀佛

稽首天人所恭敬 阿彌陀仙兩足尊 在彼微妙安樂國 無量佛子眾圍繞

願共諸眾生往生安樂國

金色身淨如山王 奢摩他行如象步 兩目淨若青蓮花 我頂禮阿彌陀佛

願共諸眾生往生安樂國

面善圓淨如滿月 威光猶如千日月 聲如天鼓俱翅羅 我頂禮阿彌陀佛

願共諸眾生往生安樂國

觀音頂戴冠中住 種種妙相寶莊嚴 能伏外道魔憍慢 我頂禮阿彌陀佛

願共諸眾生往生安樂國

無比無垢廣清淨 眾德皎潔如虛空 所作利益得自在 我頂禮阿彌陀佛

願共諸眾生往生安樂國

十方名聞菩薩眾 無量諸魔常讚歎 為諸眾生願力住 我頂禮阿彌陀佛

願共諸眾生往生安樂國

金底寶間池生花 善根所成妙高座 於彼座上如山王 我頂禮阿彌陀佛

願共諸眾生往生安樂國

十方所來諸佛子 顯現神通至安樂 瞻仰尊顏常恭敬 我頂禮阿彌陀佛

願共諸眾生往生安樂國

諸有無常無我等 亦如水月電影露 為眾說法無名字 我頂禮阿彌陀佛

願共諸眾生往生安樂國

彼尊無量方便境 無有諸趣惡知識 往生不退至菩提 我頂禮阿彌陀佛

願共諸眾生往生安樂國

彼尊佛刹無惡名 亦無女人惡道怖 眾人至心敬彼尊 我頂禮阿彌陀佛

願共諸眾生往生安樂國

我說彼尊功德事 眾善無邊如海水 所獲善根清淨者 迴施眾生生彼國

願共諸眾生往生安樂國